

摘藻堂四庫全書薈要

集部

欽定四庫全書薈要

集部

御選明詩卷八十九

詳校官原任主事

臣李斯咏

欽定四庫全書薈要卷一萬八千五百八十九

集部

御選明詩卷八十九

七言律詩二十二

錢明相

村居二首

閒倚繩牀看落暉  
疎林煙靄暮霏微  
雲邊丘隴牛羊下  
水外蘼葭雁鷺飛  
白草亂填村舍路  
清霜濃綴野人扉  
無端短鬢垂垂老  
暫得幽棲願莫違

一村茅屋鎖寒煙  
碯鹵原非負郭田  
亂後蔬飧聊卒歲  
秋來禾黍幸逢年  
疎燈夢落蒼松曉  
短褐霜寒白雁前  
屈指交遊吾獨老  
不堪貧病卧江天

白堽河問酒家

夕陽倒影下江洲  
野寺河邊暫泊舟  
此地傳經曾白堽  
誰家從事是青州  
風將送暖衣堪典  
柳似招人客可投  
且貰村醪謀一醉  
片帆明日任悠悠

徐于

春日漫興追和六如先生韻二首

不學尋真不坐禪，烏藤白恰且隨緣。  
有時貰酒呼鄰叟，排日尋花買釣船。  
鼠跡共依塵榻住，鶯聲欣傍小牕圓。  
阮生何事窮途哭，但坐茅茨便得仙。

少年生事落吳閭，老大何妨轉放狂。  
白傅堤邊新酒肆，生公石畔舊詞場。  
携來雙鬢鴉雛色，舞去單衫鵲腦香。  
縱有閒吟非澤畔，不勞搔首問巫陽。

錢謙貞

清明後晚出北城至頂山寺登白龍廟作

闌珊春事蚤啼鶯與客閑行出北城  
社鼓鼕鼕催穀雨炊煙續續過清明  
夕陽古寺歸樵影流水空山吠犬聲  
如繡年光仍在眼桃花零亂麥田橫

懷古堂夏日漫興

三間五架草堂新數卷圖書一病身  
靜似放參居士室閒如墜戶輟耕民  
浣花杜叟曾題字垂柳陶家舊卜隣  
不為薄今偏愛古南村已少素心人

豐越人

至石壁莊

一逕湖心通翠微  
入山先自著山衣  
繞籬野豆花爭放  
背日巖枝葉半稀  
漁散空洲秋水在  
煙橫高岫夕禽歸  
閒居最得無能味  
白石蒼蒼是釣磯

冒愈昌

賦得鷺峯寺前殘柳  
畲吳非熊林茂之  
留別之作

執手城隅對黯然西風殘柳驚峯前曾籠紅版橋頭月  
尚帶青溪渡口煙望去藏烏非往日愁來繫馬復何年  
因君欲折難為折忍和新詩向別筵

錢希言

揚州懷舊

三度維揚十八年舊遊零落不如前車傍擲果人何在  
橋上吹簫事莫傳潮落遠江瓜步雨烏啼荒壘竹西煙  
風流杜牧元多感到日登臨一惘然



夜渡若耶溪

樵風舟上鼓頻過十幅輕帆渡若耶  
照破離愁惟夜月啼殘歸夢是寒鴉  
霧蒸東塢山城暗煙鎖西陵驛樹斜  
只隔錢塘衣帶水依然旅食傍天涯

康登彥

城西別友

驛樓重發不勝悲執手難於乍別時  
故國殘年人去遠亂山疎雨馬行遲  
青袍暗濕為儒淚綠酒愁聽送客詩

最是關門風雪惡明朝吹盡鬢邊絲

詠柳

照影盈盈拂自垂受風縷縷弱還吹關山笛裏思歸引  
灞水橋邊恨別枝翠黛莫因春去損纖腰乍向月明移  
可憐空傍章臺老欲惜凋零更有誰

江仲漁

懷朱漁父

九溪深處是嚴灘渺渺風塵白眼看葉艇每隨幽嶂出

茅房孤掩落花殘  
芙蓉衣上雲千片  
楊柳磯頭月一竿  
釣罷瓦鉶曾共醉  
滿身零露不知寒

張復亨

遊西湖

山翠湖光畫染扉  
珠宮縹緲晚鐘微  
僧尋三竺沿堤過  
鶴認孤山背水歸  
橋影亂分公子棹  
荷香輕著美人衣  
繁華不醉飄零客  
愁聽啼鶻又夕暉

林春秀

山居

但住溝西第五村  
香秔釀熟少開門  
家僮祇自為樵牧  
徑竹憑他長子孫  
雨過曉山泉噪澗  
花生春菜蝶穿園  
抱琴客到棠梨下  
卯酒猶醺藉柳根

徐篤

病起

病起茅齋已浹旬  
案書狼籍任埋塵  
十年事業空雙劍  
半世交游復幾人  
苔井細陰桐葉墜  
荆籬秋雨豆花新

破除孤悶無他計再洗淵明漉酒巾

童珮

寄秦汝立

思君無那路重重何處山形是九龍  
蔣詡門前三徑竹陶潛宅裏一株松  
汲泉釀酒添新甕留客裁詩入暮鐘  
今夜闌干挂春月清光可似別時濃

文震孟

臚唱紀恩

紫煙浮動蔚藍天定有祥雲捧日邊國士懷慙叨寵遇  
家聲遙接仰名賢先生御筆龍章煥色映宮羅鳳彩鮮  
報主正從今日始雄文誰擬勒燕然

傅冠

早朝

西山爽氣接蓬萊紫殿光搖曙色開五鳳忽銜丹詔下  
六龍時駕袞衣來班聯禁地三台近樂奏鈞天萬舞迴  
聖主殷憂方借箸趨陪愧乏賈生才

陳仁錫

萬壽朝賀恭遇瑞雪

凌晨嚴駕喜趨陪  
宮殿霏微映早梅  
綵勝自緣龍藻結  
仙花非為剪刀催  
山山環架連雲巘  
樹樹交飛行慶盃  
知是丹青描不出  
天機織素待宸裁

鄭鄮

煙霞嶺

轉入幽清石磴斜  
何人開眼識煙霞  
深深古洞零寒雨

寂寂空林放落花有客到山棲鳥喚無僧出走亂雲遮  
年來不盡逃虛意躡屐盤桓亦我家

黃道周

西曹秋思

雪盡松寒喜未凋故園萬里詎云遙中原刁斗依清嘯  
南國梅花碎玉簫塞馬夜闌齊飲水鯨魚月出各窺潮  
風煙嶺表晴無恙不使明時缺老樵

吳孔嘉



西湖汪然明招同李太虛錢功父先輩泛不繫園

潏潏湖光十里橫  
携將書畫訂鷗盟  
清風明月消閒趣  
茗椀香爐寄野情  
小棹六橋看繫馬  
孤蓬三竺聽流鶯  
荷香處處催詩興  
一片涵空麥浪生

陸錫明

白岳太素宮

天遣名山護紫虛  
芝泥曾到使臣車  
石幢隱見宮中線

碧瓦參差帝者居封禪有書非漢時  
擲梅何地不秦餘  
未須泛海尋靈藥水落花開自起予

顧咸受

落葉

天半淒清雁字斜箇人無賴小窗紗  
三分秋色三分雨  
半似霜容半似花忽送離愁迷曲徑  
暗隨幽夢度平沙  
無情最是堪腸斷不為蕭條惜物華

王彥泓

寄懷叅仲秣陵并促歸騎

春光漂蕩別離天心似遊絲百尺牽見說人歸歸雁後  
那堪淚落落花前南都翠黛宜為史北里紅箋定幾篇  
爭似碧牕銀燭夜月痕依約話纏綿

李世熊

寄山中友人

深山深處結衡廬草木蕭森致有餘村市曉煙苔徑滑  
石橋流水月窗虛屋頭果熟秋中落牆角蕉肥醉後書

料得閉門多歲月種來松樹近何如

廖孔說

采藥

采藥秋山萬木疎霜吹瘦骨倦鋤餘雲多忽訝寒峯失  
僧少常逢古屋虛叩石杖聲驚睡鹿臨溪笠影亂游魚  
翠微十里無人到時過菴西聞讀書

雨中送春二首

迢遙煙驛欲何之地角天涯總別離霧濕提壺催祖道

煙寒杜宇促歸期徘徊柳岸鞦韆處惆悵蘭亭被袂時  
此約再來須隔歲潘郎那不鬢如絲

綠陰和水草和煙今夕明朝頓爽然才到棟花飄暮雨  
已看榕葉似秋天乍添吟鬢剛三月暗減閨心又一年  
不信古人癡似我曉鐘欲盡轉難眠

田狩龍

西爽樓秋晚

白髮盈簪老遂良秋風攏捥弄清香一簾細雨入幽夢

半面殘陽出晚涼吟罷薰爐餘獸炭病來藥草識山薑  
西樓危坐成何事月落烏啼欲斷腸

麻三雍

自平陽還襄陵道中聞蛙作

三月三日試春衣千山萬山花亂飛行人何處覓相識  
啼鳥有時催早歸日漸衝山鞭影急煙初迷樹水光微  
草深陣陣喧蛙鼓鷺鴨軍聲似也非

王屋

送黃海歸新安

清秋客子歎歸歟  
載酒題詩一送渠  
細雨亂山遮汝去  
淒風落葉對誰居  
江村處處休黃犢  
野店家家賣白魚  
見說雅懷多不減  
每逢佳勝輒停車

陳衍

題邵大行薰亭

一片蒼山落案前  
亭亭孤塔影嬋娟  
林花乍落猶含露  
池水新生即有煙  
蝶趁侍兒登佛閣  
鶴隨門客上漁船

清光盡貯軒庭內，獨榻拋書抱石眠。

王留

淮北道中

沙灘高下浴鳬鷺，新出菰蒲綠未齊。  
移橘過淮應化枳，種楊當路半生稊。  
船頭鼓角頻逢驛，河上金錢浪築堤。  
醉後無端千里夢，直隨明月到深閨。

初冬客懷

傍澗誅茆十畝宮，主人間即往山中。  
藥苗飽雨分畦綠，



楓葉酣霜合塢紅  
半夜樵歌寒趁月  
六時僧磬響因風  
如今徙倚都門望  
凍草漚沙是處同

李奇玉

過京口

蕭條書劍下關河  
芳草萋萋客裏過  
原上鶯花三月暮  
天涯愁病一身多  
海門帆影移青嶂  
山寺鐘聲到綠蘿  
入望自知鄉國近  
那堪斜日聽漁歌

楊廷樞

舟中

野岸官橋路已蕪  
寒江暮雨客舟孤  
煙中帆影時開落  
霧裏山光半有無  
宿鳥驚心猶未下  
哀猿引臂自相呼  
淒其古渡黃昏候  
一點漁燈起荻蘆

吳太冲

朱美之攜酒過話

綠陰叢裏放玫瑰  
石几相延坐碧苔  
百里雙鉞春酒醺  
一年幾個故人來  
廚丁細切溪頭筍  
穉子貪爭屋角梅

信道朱游能折鹿譚經且喜得相陪

楊廷麟

秋興

北湖菱葉近漁家煙浦荒荒雁路斜濕鳥立沙聞社鼓  
野人當戶伺田瓜月明露上蒲萄蔓夜靜風生葭蕩花  
悵望故園溪外渡一聲橫遠冷蒹葭

顧咸建

詠落葉

杖策滄江思不禁  
乍逢搖落一驚心  
迎風野鳥當枝坐  
泣雨寒蛩抱葉吟  
掃徑空餘千樹曉  
卷簾獨對萬峯陰  
幽居一夜聽蕭瑟  
片片隨流不到林

文德翼

池口阻風

伸脚蓬牕西日移  
打頭蘆渚北風吹  
沿城路僻多蚊蚋  
到夏江深少蛤蜊  
山色杳冥歸謝朓  
笛聲惆悵憶桓伊  
顏年自笑滄洲客  
破浪那能萬里期

劉侗

久遊復至鄂得家信將別黃宗之

出門未暑秋仍滯十度曾登送別舟  
久客畏聞家有信  
逢人俱道邑無收  
衣糧不恥因良友  
僮僕多言怨漫遊  
夜夜酒同鄉夢醒  
舍邊雞與渚邊鷗

萬泰

客中初度

朝來虎阜攬春暉  
矯首林泉興不違  
故國青山殊自好

王孫芳草幾時歸  
遙將兒女庭前淚  
灑入江湖客子衣  
舉目傷心歌舞地  
多情楊柳故依依

堵胤錫

舟次懷人

西風客路自禁支  
迂目林蒼覓所思  
喜不醉人村市酒  
苦難成句意中詩  
山間似古時  
窺牖鳥伴如求共  
悅枝  
永坐論心誰得許  
伊人秋水溯清漪

婺署秋懷

雨牕無事草侵除清晝簾垂步較疎千里涼生今夜月  
四更夢得故人書踏歌自詫狂非昔九藥何曾病減初  
旅況入秋真坎懍放衙愁聽鼓潭如

宮繼蘭

南枝雜詠錄一首

抗疏年年擬掛冠崦嵫日晚寸心寒白雲遙指來千里  
南雁歸飛過幾灘腸熱不知時局冷情窮猶賴主恩寬  
前途說近揚州路夢裏先承膝下歡

王鞠劬秉憲西川殿甫詩以勸駕步韻

別墅寧能卧謝安時艱特借惠文冠  
建牙自識君恩重叱馭何妨驛路寬  
烽燧無煙餘繡斧陽春有脚佇雕鞍  
劍關錦水經行處難蜀書成取次看

倪長圩

秋日過張子讀易居喜遇顧徐二子

一櫂迎秋傍晚涼疎窗燈火舊書堂  
窮愁久識張平子著述重逢顧野王  
江上蒹葭方浥露洲前鴻雁正經霜



南州孺子聞名久知有鴻文石室藏

蔡道憲

尹尊子讀書衡嶽特為我來詩以答之

嶽雲未隔幾重山君渡湘江費往還  
識面何須心便苦多情自悔夢難刪  
千家雨後花猶濕一片霜中石已頑  
為我躊躇峯頂望薜蘿有路總應攀

陳子龍

同祁世培侍御泛鏡湖

越溪千折繞山流  
黛色橫分曉蕩舟  
五月陰晴天漠漠  
一川風露草悠悠  
鳴榔空翠煙中市  
捲幔輕紅水上樓  
十二雲鬟飛不定  
獨留月鏡照人愁

錢塘東望有感

清溪東下大江迴  
立馬層崖極望哀  
曉日四明霞氣重  
春潮三浙浪雲開  
禹陵風雨思王會  
越國山川出霸才  
依舊謝公攜屐處  
紅泉碧樹待人來

晚秋雜興三首

江關海嶠接天流，玉露商飈萬里愁。  
九月星河人出塞，一城砧杵客登樓。  
荒原返照黃雲暮，絕壁迴風錦樹秋。  
極望蒼蒼寒色遠，數聲清角滿神州。

太行東出擁神京，古塞秋風右北平。  
笙鶴已辭滄海使，貂蟬初撤羽林兵。  
清霜玉沼芙蓉苑，旭日金鋪翡翠城。  
魚鑰時傳宣召急，侍臣通籍在承明。

玉泉西去翠微宮，碧瓦丹樓極望中。  
連騎每從三市出，題名時在五陵東。  
金莖夜飲仙人露，銀漢秋高少女風。

迴首欲陳閭闔迴昇平今已屬羣公

晚渡錢塘

吳山越岫隔中流  
簫鼓平明青翰舟  
萬里晴江開曉郭  
千帆春草送芳洲  
桃花欲落潮先至  
鶯語初聞露未收  
何事西陵常問渡  
不堪獨上望京樓

送吳蠻穉司李桂林

翡翠巢邊匹馬過  
千盤桂嶺鬱嵯峨  
南浮灘水啼猿滿  
北望君山落雁多  
蠻府官閒能作賦  
漢廷恩近憶鳴珂

愁心獨繫張平子欲寄琅玕奈遠何

馮留仙巡撫天津鄴仙拜少司馬一時命下賦

寄

左樞司馬擅良籌憲府中丞擁上游兵柄一門推世將  
軍容兩地接皇州三邊烽燧甘泉夜萬國梯航碣石秋  
昔日二馮歌魯衛看君兄弟並封侯

夏允彝

于山澗中

暗綠資山畫不明  
水痕初沒荻無聲  
雲能覆岸鷗衣暖  
竹肯移暉鳥夢輕  
汲女改瓶羞斷綆  
漁兒踏鯉貫花莖  
春橋此曲多風樂  
別有傷心問濯纓

曾異撰

雨經富陽

小縣飛樓俯驛亭  
竹間樹杪恣揚舲  
溪山病亦開蓬看  
風雨眠猶翦燭聽  
永夜潮來江上白  
浮嵐盡入井西青  
石尤前路無妨阻  
好住嚴灘問客星

梁朝鐘

將出皖留別楊六符沈乃功唐聖俞徐譽星諸  
先生時予將入襄歸粵

船傍垂楊別緒生  
煙含春樹雁歸聲  
羣公縞帶遺吳錦  
幕府青絲唱渭城  
幾樹烏啼趨夏口  
何時馬首望西京  
江南江北如相憶  
千里高樓待月明

方以智

贈閩中劉薦叔

聞君昨歲出溫麻作客荆吳不顧家萬里風塵憑漏影  
十年慷慨弔懷沙單衫葉落秋將盡小社城迴菊有花  
解后高談共尊酒東溪涼月浸蒹葭

送別劉薦叔

遠遊才子著仙鞭載筆江湖又十年白眼相逢秋色裏  
青山環立酒盃前一時快意難題盡千古銷魂是黯然  
重詠謫仙黃鵠句齊飛挂在落霞邊

李公柱



春日

柴桑歸去興如何老我谿山活計多  
白酒春寒逢社醉青簑雨過荅漁歌  
儘容茅屋招新燕更鑿荷池浴乳鷺  
閒裏韶華元自好願將餘歲伴煙蘿

萬曰吉

謝客

角里先生小築居蕭然衾枕半牀書  
閉門覓句江湖外濯足招寬雨雪餘  
卯酒動思千日醉辰瓜準擬一犁鉏

五陵公子多裘馬同學何人問草廬

陳瑚

新柳

東風細剪綠千條惹得輕煙自昨朝曲曲乍描京兆筆  
纖纖初學小蠻腰陌頭走馬嬌難繫枝上啼鶯怯未調  
最是送人添別恨不堪攀折上河橋

朱一是

同友人再遊虞山

輕舟十里泛平沙  
雲外虞山一半遮  
隄勢遠迴言偃墓  
草痕青入仲雍家  
野泥初圻未開笋  
溪雨欲流將盡花  
乘興不辭今日醉  
此身誰記在天涯

錢菜

題畫寄敬哉

千峯涼處隱孤廬  
匹練飛來散玉除  
閱世愁看數莖髮  
懷人靜倚一牀書  
濕雲江路鷗眠晚  
落日橋心雁斷初  
屈指秋光兩度別  
墨花遙洒自蕭疎

秋懷

叢桂秋深始著花  
泥人清賞踏晴沙  
掃來落葉供煨芋  
補就疎籬學種瓜  
芳草欲迷高士屐  
青山長護野人家  
衡門自有閒功業  
不向旗亭問落霞

魏學瀛

送方仍詰畫師

客愁難遣早思還  
今日才偷畫筆閒  
扇底生風搖古木  
屏間欲雨展春山  
無聲好句如元白  
一樣中鋒亦柳顏

却好入春歸棹遠滿江粉本水灣灣

讀韓琮商山店詩戲擬其體得樓下曉泊

一夜東風趁客舟篆煙飄處暫淹留  
帳鉤觸柱人初起奩粉吹香撲未收  
開箔先攏金約臂插花仍露玉搔頭  
誰能化作長干水日繞妝臺四面流

張若義

杏花初放遇雨

瓊宮仙女下雲車縹緲層霄落絳霞  
寶鼎千年新結子

赤城二月盛飛花陌頭柳色先春換隄畔溪聲帶雨斜  
記得皇州曾爛漫不堪重入野人家

溪邊桃花

開徧紅桃二月天河邊小景更嫣然輞川畫就連漁火  
洛浦神來隔楚煙拾翠佳人看走馬彈絲遊俠望鞦韆  
凭欄一問東流水花落無言又幾年

西湖

三月遊人去不留獨攜小艇漾中流掠波翡翠無端過

出水鴛鴦故意浮已對淡粧遲夜月更迴素影待空秋  
六橋煙景仍無恙載酒重來散百愁

燕子磯

七月江頭燕子磯銀濤捲雪浪花飛檣烏夜集珠光合  
青雀晨來嵐翠微風動帝城雲縹緲月臨天塹影依稀  
旅人四眺多憑弔白露橫空點客衣

維揚夜泊

隋堤柳樹尚依依臺榭荒丘燕子飛繡幙銀燈迴去馬

風檣雨櫂濕征衣  
城隅畫角黃雲滿  
溪上鳴笳白露稀  
二十四橋孤枕夜  
蕪城秋色動漁磯

再集第一樓

峇堯一望夕陽收  
遠陌孤帆起暮愁  
幾處笛聲吹折柳  
何人臺畔獨悲秋  
樹梢高插雲端出  
鳥背平看天際浮  
極目河山空佇立  
越王臺榭委荒丘

望金山

疑從蜃氣結為臺  
天半芙蓉水面開  
百壑那能探到底



一峯何處特飛來登臨可得龍蟠勢瞻眺應須虎變才  
指顧風帆已千里蛟宮鼉鼓吼如雷

候風

篙師估客意飛揚錦纜牙檣思淼茫北溟鯤魚期變化  
南圖鵬鳥待翱翔江空水氣連天白日落沙光動地黃  
夜半松濤來萬壑濟川舟楫詎相忘

九日雨酌

無端風雨又重陽蕭瑟楓林自舉觴阻我青山曾有約

撩人黃菊幾時芳  
空庭暗落高梧影  
幽砌微聞濕桂香  
猶喜携筇雙屐健  
客來應不厭蒼涼

溫璜

寄友

靈隱峯前手暫携  
千章新綠子規啼  
眼邊流水春重到  
別後停雲思幾迷  
俯聽露珠傳點畫  
驚聞藥裏亟刀圭  
殷勤簡付遺方法  
茹澹安緣緩杖藜

黃淳耀

次韻酬別張子石

百丈牽江一線平，勞君客裏念歸程。  
即看去住誰能料，可是分離莫漫輕。  
白鳥背飛星子驛，朱旗遙颭石頭城。  
船牕日把詩篇坐，香草含風處處生。

張貞白有離世之志，作別廬舍詩見示，余反其意留之。

瓜廬小結在塘坳，城市脩然即遠郊。  
谷為愚公寧避辱，亭因揚子不辭嘲。  
鳴蜩蟬盡猶緣砌，舞燕春深亦認巢。

莫愛雲松棲絕壁山中依舊要誅茅

劉曙

湖稍曉汎

湖氣初開澹澹中掛帆回首認垂虹盤餐飽領諸山色  
夢醒平分昨夜風細浪未經漁罟亂輕霜微辨橘林紅  
無端浩蕩生悲慨獨往情難與衆同

新正十六日過郭君昌園亭探梅留題

疏泉列樹繞春堤萬白參差一望齊果下馬行欺鶴氅

池邊人醉擁香泥  
午風寂寂光先亂  
春霧冥冥思欲迷  
聞說鷗夸曾借宿  
鶯花錯認苧蘿西

茅元儀

春夜同屠冷玄于該博堂前坐月

杯停花睡正三更  
寂寂閒除澹慮生  
月洗纖雲天似潤  
風搖狂絮柳如醒  
乍尋詩味抽春筍  
難冷交情炙凍笙  
留得一詩存勝日  
侵晨又去伴啼鶯

葛一龍

煙雨樓

煙雨樓頭春乍晴  
鴛鴦湖上鳥嚶嚶  
中浮片席空三面  
斜抱千家截半城  
漁網曬來風柳變  
酒船搖出浪花生  
夕陽慣照凭闌妓  
一抹遠山紅袖明

馮鼎爵

知非

端居曾不羨  
遭逢五十年  
來事事蒙半偈  
常持朝與暮  
一尊不慮雨  
魚風尚偕妻子  
蝸粘壁每赴山林  
鳥脫籠

莫鬪兒童花草隊  
鬚眉白早誤稱翁

泖居自題

半生已過更謀居  
水北山南漫結廬  
一派濃陰迎杖履  
數彎濕碧飽瓜蔬  
避人不復新求友  
無事重繙舊註書  
并撤東籬招爽氣  
飄零素業本空虚

董養河

山居和陳元凱韻

日日千峯雲覆垣  
蘭畦菊町地偏繁  
洗盂不厭山僧淨

爭席時聞野老喧  
澗底撈蝦喂鶴子  
花間聚蟻飼雞孫  
賣將殘卷完租稅  
清夢無驚吏到門

吳德操

秋興

莆田七月海風秋  
誰到江東寫我憂  
露冷芙蓉王儉幕  
書藏夾漈鄭樵樓  
卜居未有安危信  
行路方知出入愁  
笑指雙星河漢闊  
明朝未必渡牽牛

朱茂曙



秦淮河春游即事

橋下溪流燕尾分，灣頭新水慣湔裙。  
六朝芳草年年綠，雙調鳴箏戶戶聞。  
春雨杏花虞學士，酒旗山郭杜司勳。  
兒童也愛晴明好，紙翦風鳶各一羣。

馮鼎位

月下聞笛

露下芙蓉夜氣清，愁聞短笛弄新聲。  
誰傳千載柯亭管，調出三秋故國情。  
風外餘音還斷續，曲中離緒轉分明。

來時折柳曾相贈  
吹得今宵夢又生

懷社中諸子

風塵世路悲青眼  
長嘯悠然有所思  
故國雲山勞夢想  
天涯兄弟憶參差  
春風幾度平原酒  
白雪諸君梁苑詞  
搖落故人羈旅客  
南來雙鯉信偏遲

舟中和陳卧子作

波搖落日衆山青  
載酒談奇是舊盟  
蘆荻洲邊迷野色  
芙蓉江上澹秋情  
舟疑有道同元禮  
詩愧中郎和少卿

試向中天呼月出  
驪龍滄海戲珠明

李士標

江行即事

渚鷗一一泛春聲  
江面煙消萬里平  
花月故臨揚子渡  
布帆無恙潤州城  
蒼茫曉色迷鴻雁  
款乃歌聲怨杜蘅  
放眼正愁煙水濶  
亂山天際忽縱橫

徐時勉

上元日憶鄧尉光福諸山

東風殘臘早探支改歲尋春較客遲老興却當全嬾日  
梅花又過半開時雪消最愛西山路頭白重吟東閣詩  
拄杖籃輿迷望處年年搖蕩看燈期

馮夢龍

冬日湖村即事

蒹葭一望路三叉遙認莊窩去路斜舟響小溪過蟹舍  
屋頽高岸露牛車輕霜堤柳餘疎葉暖日村桃早放花  
平野蕭條聊極目遠天寒影散羣鴉

張紀

江村春望

春風爛漫遶天涯  
曳杖江村攬物華  
身在故鄉仍是客  
心從安處即為家  
貧來生計號寒鳥  
病後居諸赴壑蛇  
更得幾年還健在  
青門常種邵平瓜

徐同貞

寒食郊行

二月春寒未減衣  
嫩晴天氣日熹微  
桃花落盡水初漲

燕子來時笋正肥  
林外酒人浮白去  
莎邊游女踏青歸  
却嫌輸與東京路  
尚欠郊原綵索飛

丘上儀

千齡社集詩

孤村冒雨墊綸巾  
一濯衝寒破水淪  
自是素心堪共侶  
好將末俗使還淳  
藏身曾學姚平仲  
招隱誰呼祁孔賓  
良會詎應誇競病  
舉杯且盡甕頭春

張鴻磐

詠茉莉

九里花田上  
纈航慣先朱  
夏關芬芳貯  
來深院人人喜  
開近斜陽夜  
夜香養徹龍  
膏專薦寢  
緊盤蠻髻更添粧  
西窓月色涼  
何事照見明珠墮枕旁

歸昌世

詠落葉

除却離憂  
百事慵重來  
苔徑舊時蹤  
江清秋響風催棹  
鳥去庭空月照筇  
回首獨愁千萬樹  
隔林細數兩三峯

茫茫顛顚初冬色  
颯沓時聞五夜鐘

馮延年

簡張天生

共誰聽雨夜連牀  
獨擁殘書快雪堂  
雲歛鷺巢從樹出  
風來藕葉倍花香  
平湖小舫空秋月  
斷塔孤峯愛夕陽  
吾欲糟丘營此老  
待君同酌水仙王

索徵

文彥可移居和子垂韻



梭韞桐帽野人裝家具無須載滿航臺隱客星垂釣處  
山留君子讀書堂宵同巢鶴聽松雨午就溪僧煮蕨香  
張北周南鄰可卜結茅終擬儗君旁

郭金臺

宿上封寺

望盡南天不可捫到來始識上封尊衆山却立如空壘  
絕頂平蕪一小村人定莫教鐘破寂峯高直有月侵門  
禪關無諍聲聞淨帝座平看尺五痕

寄馮其立

不惜舟車萬里身  
白頭潦倒轉風塵  
使君兩度論賓主  
幕府三年歷粵秦  
嶺表開樽應盡醉  
巖疆得句幾回新  
題書滿野秋風颯  
歲晚梅邊憶故人

姚士粦

送郁文茂赴新寧州幕

佩刀曾說夢中懸  
南赴邕州下瀨船  
秦吉了能傳訟語  
那投猺肯納官錢  
荔房摘供紅溥露  
榕樹排衙綠染天

蠻幕有時趨大府  
姬隅應和郝生篇

沈章

靈谷寺看梅

下馬看碑度孝陵  
山椒十里樹層層  
半開香氣清於水  
一路人家靜似僧  
春動粉鬚都化蝶  
夜寒花片欲成冰  
思憑一枕羅浮夢  
月白煙黃睡未能

徐仲選

水村

照檻晴光眼欲迷  
瘦藤斜影度橋西  
沙頭白鴨黃鸝睡  
籬畔瓜棚豆架低  
屋似魚船疎荻繞  
亭如僧笠稚松齊  
此鄉風景真堪戀  
只合携筇坐菜畦

朱隗

天長苦雨

縱橫野水斷人行  
荒綠堆窓一望平  
傍舍秧齊聞擊鼓  
北方鼓北插秧方隔籬花豆見  
移檠天涯弟妹連  
宵夢澤國風煙  
幾日晴酒醒空堂涼  
不寐怒雷驅雨入湖聲

孫淳

玉峯塔下別天如

經過便聽塔鈴聲誰解銷魂此日情  
客為譚深催別暮船隨潮便報帆輕  
偶因懷友重憑檻悔不看山再入城  
二十餘年芳草寺隔查相望水盈盈

劉城

九華雜詩

祇園高處不勝寒四望悲風獨立難  
我以輕衫當晝解

僧言殘雪昨宵乾木皮覆屋冬偏好竹葉編籬卧亦安  
忽覩金光爍初地滇南一塔日中看

顧玘徵

感舊

烏衣門巷舊遊非王謝堂前燕子稀有客有客莫遑處  
式微式微胡不歸乾坤萬里愁雲合風雨三秋落葉飛  
極目天涯誰與語釣蓬思老一漁磯

唐獻可

次白門江上

十日無端學泛家隨緣詩酒坐星槎汀頭煙舞盤青鳥  
江底光翻墜彩霞浪激寒潮初破夢月移子夜淺銜沙  
長年快說東風急吹落蘆洲幾里花

潘一桂

冬日

寂寞江干深寄跡一巢無計拙於鳩履如東郭笑何病  
賦似長卿貧不憂白景驅愁催短髮歸鴻銜夢下寒流

何時小築菟裘地著在蒼山碧水頭

邵昇遠

田家樂為陳孟言賦

香稻收花蕙已齊幽棲渾似瀼東西  
萬竿修竹千叢菊  
十角黃牛五母雞婦起炊糜朝出饁  
客來留榻夜分題  
橙黃蟹紫新醅熟日日何妨醉似泥

徐爾鉉

訪法相西上人有作見示次韻酬贈



卜築孤凭絕壁間  
靜中詩思幾曾刪  
臺前歸鳥如相識  
窗外浮雲即等閒  
一徑野花常到眼  
十年清夢不離山  
我來共對飛泉下  
日落松鳴去復還

陸瞿彌俞彥直張藍田馮素生醉月竹西軒懷  
唐尹季張子念

閒中宴笑可相求  
水上亭虛恰勝舟  
入座月爭先後得  
侵杯花競淺深浮  
從來酒國難為夜  
莫把歡場易送秋  
醉倒胡牀人勿訝  
霜天幾作異鄉愁

湖心寺

春望葑田綺繡成紅舡淺蕩縠紋輕一聲磬響隨雲遠  
數曲橋闌貼水平柳暎圓波魚極樂塔連殘照寺空明  
天然獨擁諸峯立酌茗寒潭韻更清

吳棧

無題和斗生二首

海外雲生碧浪陰  
頰鱗蒼雁總浮沈  
寥寥天漢雙星小  
寂寂梨花一院香  
貞玉有光還易見  
明珠無定杳難尋

輕鸞欲繡愁無力除是靈芸七孔鍼

巫山遠在暮雲中愁隔春燈一點紅莫道金刀難翦水  
須知紈扇也驚風化為蝴蝶飛纔並除是鴛鴦睡不同  
最是游絲無賴甚又牽春去過牆東

朱樵

新柳同陳確菴賦

日煖江干二月天風吹楊柳色娟娟漫愁力怯難勝雨  
已覺晴多解惹煙池上只今方釋恨陌頭何處不堪憐

往來便恐輕攀折寄語離人客路邊

秋柳

東城南陌思無窮煙淡鶯殘事不同漢苑風情寒薜荔  
灞橋顏色老梧桐蕭疎野店殘陽裏寂寞池塘細雨中  
何限相思誰共語可憐迢遞待春風

曾元良

秋柳

俄驚搖落渭城邊悵望遙堤絕可憐病葉幾能禁驟雨

柔條猶自鎖寒煙  
從教歌院頻翻譜  
忍見郵亭更折鞭  
淒斷新霜板橋曲  
衰荷相伴曉風天

吳騏

三月三日集六益齋得微字

永和癸丑蘭亭後  
江左風華歎式微  
草澤行吟心不展  
英雄沈醉計終非  
坐看日昃人空老  
不覺春深花自飛  
紅炬將殘共分手  
非關別恨獨沾衣

鹿門草堂晏集分詠漢高

武媼壚頭酒未闌醉中斜帶竹皮冠秦皇東望驚雲氣  
神母西來哭夜寒萬里冥鴻懷綺季一時烹狗負彭韓  
未央工壽真無賴活得杯羹且盡歡

得王玠右書言及苴苗為蟲所食

美人離別動經年燈下欣看尺素傳落落晨星傷聚散  
盈盈天漢阻纏綿鳳凰久失丹山樹螟螣休侵彭澤田  
念我飢驅長作客窮愁相對一潸然

倣義山體

碧鎖花光繞鏡臺  
畫梁雙燕玉飛迴  
東方千騎踟躕立  
雲際高樓縹緲開  
大路攬袪私未敢  
春風吹夢或容來  
自憐夙有專城壻  
辜負君家作賦才

綺閣微吹淡淡風  
海棠猶在錦帷中  
枕前文蛤千年影  
堦下珊瑚八尺紅  
小袖李文春思薄  
息肌沈水夜香通  
六更更報蓮花漏  
莫道朱欄日色融

碧海波平月滿輪  
笙歌千騎踏香塵  
十重錦帳時時夜  
五色鮫綃樹樹春  
嘉果合歡馳騎急  
長蛾宮樣曉粧新

芙蓉一萬開南苑誰是當年第一人

來青樓看海棠

積雨兼旬春事遲朝來晴日散遊絲扁舟西去水平岸  
喬木參天花滿枝國色驚心看不足舊遊如夢立移時  
憑欄日暮無歸意月下重傾金屈卮

清曉繁花更動人日光初著露華新嵎山紅雪飛初定  
泉客鮫綃染未勻短髮暗傷春色暮窮交老覺酒杯親  
歡娛莫放今朝暇回首東甌有戰塵



贈林安國

蚤歲遨遊洛水濱  
那知天地忽風塵  
玉顏暫作平原客  
皂帽終非魏氏臣  
家散萬金無德色  
書成千卷有傳人  
吳剛向在清虛闕  
期爾同登七寶輪

次韻酬丁勗菴

草舍叢篁不見天  
素琴掛壁本無絃  
餘生久已依長鍾  
國士虛勞贈綵牋  
濁酒但須娛暮旦  
浮名何用問千年  
有涯莫與無涯競  
最愛南華第二篇

喻應益

滕王閣

飛閣千年勝跡留層巒遠水檻中收  
萋萋岸綠王孫草  
湛湛江平帝子洲  
煙樹尚含羅綺怨  
風濤不散管絃愁  
飄零莫縱登高目  
門掩斜陽獨下樓

陳鴻

留別敬師

浪遊行橐倍蕭然  
但有山僧送上船  
月白不堪蓮社別

日高難戀竹房眠曉糧載少癯同鶴秋思悲多亂似蟬  
後夜憶師空夢寐淮城東畔寺門前

王鑑

九江道中

離鄉已遠斷鄉愁風物無邊飫浪遊異壁煙霞常共色  
一灣鷗鷺各分洲青山雜樹陶潛縣明月孤城庾亮樓  
身寄片帆如過鳥舟人指點屢回頭

鍾曉

春愁

虛館春愁鬢欲彫，更緣多病暗無憀。  
荀思出土猶藏甲，柳學迎風漸折腰。  
盡說黃金長不壞，那知碧血最難消。  
何須西上蘇臺望，一笛殘陽舊六朝。

喬長史


詠醉楊妃菊

嫋娜嬌姿不耐霜，芳根移得在朝陽。  
帶將春色三分艷，散作秋陰滿院香。  
傾日尚疑聞羯鼓，臨風猶似舞霓裳。

祇愁野鹿偷銜去寂寞梨園空斷腸



御選明詩卷八十九



總校官庶吉士臣侍朝

校對官編修臣莫瞻業

謄錄監生臣和其聲

欽定四庫全書薈要

集部

御選明詩卷

九十一

詳校官原任主事

李斯咏



欽定四庫全書會要卷一萬八千五百九十

集部

御選明詩卷九十

七言律詩二十三

張宇初

聞霜鐘

霜滿瓊林度曉鐘  
月華流韻徹晴空  
投簪幾憶鴻鳴露  
欹枕猶驚鶴唳風  
銀葉香消深館裏  
梅花調遠古城東  
十年感慨成無寐  
應律音長豈世同



鄧羽

寫懷

道人不作槐根夢一片虛頑太古心無雪可催蒼檜老  
有家原住白雲深山頭月落虎長嘯海面風生龍自吟  
世上何人窺此意野花啼鳥是知音

林復真

送東白副綱還雲間

三年客裏惜居諸此日功成貝葉書幾度賜衣沾湛露

滿懷歸興載籃輿山橫齊魯吟情好月落秦淮鴈影疎  
若過吳門煩問訊故園松竹近何如

吳孺子

姚太史自錢塘移天目松一株舟中索賦

相公送客過錢塘移得蒼松數尺長枝帶故山寒雨色  
根分新壤茯苓香舟中偃蓋童童勢眼底淩雲寂寂芳  
歸去琴書堂上坐種來無處不生涼

祝萬壽

九日登高有感寄懷錢太史

落木蕭蕭兩鬢皤登高縱覽舊關河  
漫嗟魚腹英雄老爛醉龍山感慨多  
千古風流吹帽盡百年時序插萸過  
石函君已鐫名久有約龍沙共放歌

梵琦

懷淨土詩

幾回夢到法王家來去分明路不差  
出水珠幢如日月排空寶蓋似雲霞  
鴛鴦對浴金池水鸚鵡雙銜玉樹花

睡美不知誰喚醒一鑪香散夕陽斜

余嘗夢至一山聞杜鵑且約雪窗南還

出郭尋春未見春東華踏徧軟紅塵不知蝴蝶化為我  
何處杜鵑來喚人筍蕨過時惟恐老櫻梅如豆正嘗新  
及今無事早歸去莫待秋風江上蓴

金山

半江湧出金山寺一簇樓臺兩岸船月轉中宵為白晝  
水吞平地作青天塔鈴自觸微風語灘石長磨細浪圓

龍化老人來聽法手持珠獻不論錢

宗泐

送王蕙芳之金陵

涼風一棹送君初秋雨荒溪草樹疎十載丹陽舊遊地  
數封燈下故人書已看有志能投筆豈謂無門可曳裾  
後日天邊見鴻鴈憑將消息報何如

登峨眉山

千尺蒼崖一小亭大江東下入滄溟磯頭牛渚從來險

天際峨眉不盡青  
南北山川分歷歷  
荆吳檣櫓去冥冥  
十年兵後重來客  
獨倚闌干兩鬢星

偶作

新作方池水未平  
晚晴獨自繞池行  
好花都向雨中盡  
幽鳥忽來林外鳴  
科斗黑時初種藕  
鴨頭綠處欲生萍  
匡山舊業閒料理  
更結茅亭此計成

偶作次王以中韻

拄笏高人塘外居  
作詩直與古人如  
偶從荷芰香邊得

閒向簪簪節上書  
白露濕堦涼氣早  
青燈照壁雨聲疎  
曉來不署金吾事  
帶劍承明去直廬

來復

登南嶽祝融峯

石柱盤盤紫蓋東  
斗衡垂耀亘天中  
水通巫峽三湘闊  
地接炎荒五嶺雄  
別洞龍歸雲盡黑  
下方雞叫日先紅  
一丘終老從吾願  
何待黃金布梵宮

題衡嶽天柱峯



一柱通天鎮火維層標拔起勢孤危翠磨日月盤三楚  
影落沅湘帶九疑羅漢時來乘白鹿祝融晝下閃朱旗  
神燈夜夜朝金刹知有高僧禮六時

次韻荅繆架閣兼東陳元善都事

書劒東遊客四明風流從事最多情酒香邀共山公醉  
詩好吟如水部清洗馬柳陰潮欲白呼鷹原上雨初晴  
龍門定有重來約埽月青松聽瀑聲

送榮首座還日本

揚帆八月挂長風直遡扶桑碧海東雪窟潮翻銀甕白  
天門日湧火車紅蝦夷覓偈迎沙島龍伯分齋候水宮  
應有國人來問訊散花圍坐聽談空

送日本希白上人禮祖塔之金華

天香吹滿屈眱衣幾度承宣到鳳池梵語傳來西竺戒  
華音吟得大唐詩樹間繞佛長鳴錫洞裏逢仙不看基  
無縫塔開瞻舍利千江月映碧琉璃

送雲講師召還吳門

老病蒙恩逐熱還寶泉頒賜起衰顏木杯度月百花外  
榭笠挂雲雙樹間呪罷龍公齋鼓寂講餘獅子定鐘閒  
也知去住無心好渾似當時未出山

送戶部徐主事謝官歸豐城

自慚官祿與時疎曉納牙牌別玉除朝鼓罷陳新奏牘  
夜燈歸校舊藏書青桑五畝連雲種黃獨千株帶雨鉏  
藉是身閒天所放不愁囊澀俸無儲

耕隱為南昌萬用中賦

山莊別築楚城西百畝桑陰水一溪  
莎草雨晴黃犢卧  
稻花風暖白鳩啼  
沽來官酒春新社  
讀罷農書曉灌畦  
孝悌力田新有詔  
姓名還向御前題

送錢子予新除博士致政還越中二首

除書新拜荷明君  
祖別春筵采泮芹  
餐玉未從仙老試  
賜金應與故人分  
淖船夜渡娥江月  
山屐晴探禹穴雲  
龍節虎符勲烈舊  
過家先讀表忠文

修髯如雪面如丹  
芰製新成野服寬  
湖近季真期卜宅

寺依靈徹話休官  
霜紅柿葉尊前寫  
月白荷花鏡裏看  
有約沃洲騎鶴去  
卧雲不畏碧山寒

題鍾山新寺後二日  
欽蒙聖製和章感  
遇之餘  
謹再用韻賦

寶刹新成護百靈  
鍾山泉石有光榮  
金輪朝佛諸天喜  
玉帛來王萬國平  
定起不知明月上  
身閒只愛白雲迎  
龍飛幸際雍熙日  
親見黃河一度清

題趙彥徵溪山小景圖

曾汎苕溪看晚霞紅蓮小艇穩於車  
水通孤岸橋依竹路入重林屋傍花  
風外眠鷗驚客笛雲中吠犬隔仙家  
秋波千頃芙蓉老誰覓王孫舊釣槎

送胡文善之官海南文昌縣二首

瓊州南去海冥冥婺女垂光應地靈  
洞入朱耶瀧水白山蟠黎母瘴烟青  
郵炊每食桺榔麪蠻賦多輸翡翠翎  
定有遠人歌善治風謠紀德重鐫銘

九域於今總一家文昌誰道隔天涯  
石榴紅釀蠻江酒

海漆香收瘴洞花寨上人耕春作市棠陰吏散晚休衙  
蘇公應共題詩好儋耳泉頭駐小車

寄東玉山處士

浮玉山前種紫芝松蘿雲月共幽期封侯不羨黃金印  
對客長歌白雪詞柳浪平湖春放棹花陰圍坐晝彈棋  
從遊公子多才俊不寄新詩慰別離

寄洞庭葉隱君

一舸南歸鬚欲華買山湖上卧煙霞尊如北海應多酒

園擬東陵亦種瓜  
丹壑泉春雲碓藥  
橘林風埽石牀花  
傳家自與隣翁異  
只說藏書有五車

守仁

靈谷寺法會應制

寒巖草木正嚴冬  
一日春回雨露濃  
安石故居遺雪竹  
道林新塔倚雲松  
木魚聲斷催朝飯  
銅鼎香消起暮鐘  
千載奎文留秘藏  
天光午夜照金容

寄鐵厓先生



先生謝客居東里使者傳宣拜下牀  
樂府謾推梁子範  
禮經須問魯高堂  
酒頌捐馬來光祿  
賦到龍旗說太常  
賜老鑑湖猶有待  
山陰茅屋未淒涼

二月三日泊瓜洲渡與吳菴同賦

淮烟漠漠夕陽收  
楚樹昏昏翳客舟  
風度鐘聲來北固  
帆將燈影過揚州  
雲銷碧海天無際  
波撼金山地欲浮  
獨恨壯游非昔日  
滿江風露夜如秋

荅王叔潤

天祿燃藜嬾校經  
鷁舟隨處泊鷗汀  
西風舉扇無王導  
東海移家有管寧  
溪雨初晴雲更白  
湖霜未落草猶青  
客樓寂寞江天外  
幾度遙瞻處士星

寄樸隱南州

泖上歸來百事慵  
一春愁緒似衰翁  
卧聽溪閣三更雨  
數到江花幾信風  
舊日親朋多楚越  
孤雲踪跡尚西東  
舵樓晚飯人如玉  
清夢無時落鏡中

三月廿八日早渡浙江

塵事縈心不暫安天涯憂抱若為寬人因病久交游絕  
士到名成出處難水國鷄鳴催客渡山城花落送春殘  
會當一畝忘情去得共雲松老歲寒

寄戴伯貞

東望湘雲客思多故人歸計近如何江都夜月瑤花夢  
海國蠻煙荔子謠落日麒麟猶草野滄江鷗鳥亦風波  
碧桃窗下聽春雨誰肯金貂換綠蓑

寄題雲屋

浮丘山下見劉蕢每說交游獨念君  
鼠尾謾誇狂博士  
虎頭誰識舊將軍  
孤舟夜雪臨丹壑  
破屋秋風補白雲  
我是玉山堂上客  
幾時呼酒細論文

答倪元鎮

禪榻清談屢有期  
茶煙想見鬢絲垂  
春風水榭停蘭漿  
夜雨湖山寫竹枝  
甲煎沉香都入夢  
新蒲細柳總堪悲  
鷗鷺飛處重相憶  
擬和樊川五字詩

次韻懷冷泉禪師

八年京國鴈書沈  
每見游僧問好音  
已喜法支流日本  
賸傳詩價到雞林  
馬嘶赤撥晨朝散  
花落攰逾午定深  
今雨不來春又暮  
鷺峰煙樹綠成陰

送馮以清調成都衛知事

越客傳來浙上書  
故人闕下拜新除  
荆門馬度霜晴後  
峽口猿啼月上初  
鐵筓灰寒參畫外  
戈船風動笑談餘  
清秋幕府多閒日  
為訪文貞舊隱居

次韻答葉夷仲

大荒南去渺煙沙萬里曾乘奉使槎得句多留支遁室  
藏書未減鄴侯家風清曉殿陳三策日靜秋庭判五花  
惆悵西齋涼月夜山枰誰共薦槐芽

題耕南為王子安作

讀殘書卷雨聲稀耕破春雲晚色微瓦缶自傾蒼朮酒  
金貂不換綠蓑衣江花未落秧針短隴草初深繭栗肥  
翻笑義熙陶縣令田園荒後始知歸

次韻沈文舉忽見梅花

看梅曾感故園情每到開梅別恨生  
舊樹已從兵後盡新枝忽見水邊橫  
夢迴山閣梨雲白月滿江城畫角清  
欲寄西湖早春信楚天霜冷鴈無聲

萬金

乙巳清明泊舟柳胥浦

柳胥浦上綠楊邊客裏清明繫客船  
莫遣桃花作紅雨且看榆火散青煙  
笙歌漫說承平日耕稼深期大有年  
邂逅農人且相慰軍儲無限望吳天

夷簡

正月十三日三鼓上御奉天殿集公侯百官奉  
上佛表命禮部尚書齋赴鍾山啟建法會

御手封函出紫宸百靈効職共紛紜尚書夜待三更漏  
使者朝持五色雲宣室鬼神徒有問茂陵封禪謾能文  
陳情此日趨靈鷲萬歲千秋報聖君

十五日上服袞冕乘輦輅赴法會至日夕迎佛  
上率公侯百官臨法筵供佛行大禮樂用善世



等曲先是十四日微雪尋即開霽是夕星月在  
天風露湛寂絲竹迭奏燈火交輝禮儀之盛前  
古莫及賦迎佛禮佛送佛三首

鷲嶺幡幢下界來先令滕六淨氛埃微風不動燈如晝  
明月初昇樂似雷宿衛萬夫嚴虎旅從官千騎駐龍媒  
袞衣儼在通明殿一朵紅雲擁不開

天子臨筵禮覺皇衣冠陪位亦侯王寶臺高處金蓮色  
珠樹中間玉珮光幣帛奉陳先盥洗茶甌初獻謹焚香

漢庭不必論前夢親覩金容在上方

皓月華星傍九霄夜深端坐聖躬勞樂聲按舞魚山近  
花雨飄空鷺嶺高玉冊讀文傳太祝金柈捧奠出儀曹  
從容望燎鑾輿動目送中天白玉毫

清濬

上命和山居詩

老來一鉢住巖幽塵境無心得自由空裏每看花滿眼  
鏡中漸覺雪盈頭吟餘月照千峯夜定起雲生萬壑秋

身世已知渾似夢百年光景水東流

白髮山僧住翠蘿餘生身事任蹉跎倦從石上支頤坐  
閒向雲中拍手歌舍利現時光煜煜伽梨披處影娑娑  
鍾山咫尺城東地草木偏承雨露多

曇噩

金山寺

崢嶸兩岸市廛開愛靜人尋此處來水底有天行日月  
山中無地著塵埃塔擎燈影明雲杪船載鐘聲出浪堆

自信平生有仙骨好風吹上妙高臺

智及

答東皋伯遠法師

東皋尊者隱郊墟小小屠蘓睹史居  
切柏代香朝演法捲簾進月夜抽書  
村園菓熟秋霜後花徑苔生宿雨餘  
心境兩忘諸幻滅更餘何處覓真如

良琦

春日寄東趙仲光沈自誠二友

二月湖州動客心  
青山粉堞帶春陰  
溪溪漁屋桃花靜  
面面歌樓柳色深  
西府門閑鷗自到  
東林酒熟客誰斟  
風流二妙如相問  
為道清吟瘦不禁

秋日歸虎丘懷鈺仲剛書記

虎丘共作五年留  
幾度相攜上小舟  
楊柳春橋半塘寺  
芙蓉夜月百花洲  
長林放鶴閒支遁  
一室編蒲老睦州  
此日獨歸懷往事  
空山草樹不勝秋

春草池綠波亭

桃溪綠水接深池芳草如雲護石磯  
色映湘簾春雨細波明畫舫夕陽微  
最憐才子新成句因憶王孫久未歸  
況有高亭更蕭爽日長留客看清暉

廷俊

石頭城次王侍御韻

衮衮長江去不休巖巖盤石踞城頭  
千峰日落淮南暝萬樹風高白下秋  
流水尚遺諸葛帳東風不與阿瞞留  
中原一髮青山外萬古終為王謝羞

懷渭

送仁一初上人遊武林

舞鳳飛龍若箇邊  
天涯送遠獨淒然  
江山南渡降王宅  
風雨西陵過客船  
踏雪馬塍春買樹  
鬪茶龍井夜分泉  
落花寂寞東歸日  
煙嶼冥冥叫杜鵑

德祥

聽雨篷

溪邊茅屋兩三椽  
寬窄真如一釣船  
幾樹暮鴉篷底看

一瓢春酒雨中眠舊愁無復來心上新夢何由到枕邊  
我亦江湖釣竿手菰蒲叢裏住多年

寄余復初鍊師

崑峯峭峭玉叢叢有意尋仙到此中流水年華逢甲子  
秋風城郭見丁公門前丹氣無人識洞裏棋聲有路通  
借得古松同鶴住共看塵世事匆匆

南浦春耕

索索縲車谷口聞鳥催農事日紛紛新生野水瓜藤繞



舊作田塍井字分耕雨每憐黃犢健帶經猶愛小兒勤  
晚風獨立溪橋外流水桃花一隊雲

戕溪晚釣

牛渚山前白鷺飛船頭坐得便無機鶯從柳絮風中聽  
魚到桃花水後肥有夢只因懷太白逢人多是說玄暉  
一壺春酒江村暮泊在戕溪醉不歸

訪息耘不遇

語聲了了出溪灣只隔桃波一步間自愛黃鸝春後至

多愁燕子雨中還坡晴細草平如剪花曙閑門半不關  
欲覓行踪雲滿地人言採藥在他山

次韻張布政游山

不因覽勝入松門猿鳥何曾識使君黃葉路從流水上  
青蘿牀與白雲分逢僧且說新裁句見寺先尋舊刻文  
冰雪寒巖春到後樹如膏沐草如薰

過湖州

平生只想住湖州僻性迂情可自由一片水聲中倚杖

幾重山色裏行舟東林書卷貧猶買西塞綸竿老未收  
緩得歸程過寒食杏花春雨聽鳴鳩

題林屋洞天

羣山包水水包山金作芙蓉玉作環洞裏有天通五嶽  
山中無地著三班白雲彷彿雞初唱碧海迢遙鶴又還  
可惜桃花有凡骨年年隨浪出人間

螺川送別圖

五老峯前送別圖社賢今日未應無路經黃葉千年寺

人倚西風十幅蒲銅斗舊歌聞楚甸尊羹新興入吳都  
重山複水閒踪跡自在飛雲一片孤

為馬仲禎題一灣煙水

占得沙河水一灣此身能與狎鷗閒桃花斷岸無船到  
楊柳衡門盡日關千里煙波歸老眼十年魂夢又鄉山  
扁舟西塞山前路流水肥魚待爾還

荆溪有懷

荆溪一壑舊風煙鷗鷺盟中念昔賢春水田疇蘇玉局

夕陽庭樹杜樊川雞聲啞啞荒村外鳥路迢迢暮靄邊  
欲覓高僧問南嶽碧雲西望草芊芊

妙聲

次韻道竹可清明雨

風雨蕭蕭夜向晨清明都付寂寥濱吹殘野外無窮柳  
消盡江南大半春臨水桃花還有浪銜泥燕子不生塵  
匡牀坐穩渾慵起賴得同人笑語頻

至仁

次韻馬國瑞員外遊會稽

勝遊還與馬遷同直上東南第一峯  
神禹穴深蒼木合  
李斯碑在紫苔封  
晚雲仙島翔歸鶴  
夜雨靈湫起蟄龍  
若見故人煩問訊  
松間石上幾時逢

送謙上人還日本并簡天龍石室和尚

回首扶桑若箇邊  
春風萬里上歸船  
神龍饋供雲迷海  
仙女吹花月在天  
密意西來端有得  
新詩東去豈無傳  
若逢石室煩通問  
歲晚南湖學種蓮

次韻簡蘓昌齡學士仲銘禪師

曾向燕然勒漢銘  
吳門今對萬山青  
朝端聲價蘇司業  
海內交游嵩仲靈  
何日袈裟登釣艇  
此時雲錦照溪亭  
一尊正候陶徵士  
莫學三閭愛獨醒

法住

杏村牧笛

杏村一逕遶湖西  
牧子閒將短笛吹  
顛倒自騎黃犢背  
參差巧弄綠楊枝  
花陰響動風來處  
樓外人聽日落時

憶昔雨中曾問酒謾勞指點與人知

如蘭

曉發

東風卷雨曉雲收兩岸雞聲送客舟  
柔櫓不驚沙上鴈殘燈猶照驛邊樓  
天連野水浮雲闊斗轉銀河拂地流  
遙望吳城何處是青山數點落長洲

大本

送徐行正人材之京



鴻雁來時澤國秋  
西風潮落大江頭  
蒹葭楊柳東西岸  
楓葉蘆花遠近洲  
鍾阜煙霞千嶂出  
蓬萊宮闕五雲浮  
丈夫勲業青冥上  
莫為思鄉易動愁

似杞

寄題劉氏雙翠軒

兩株擁秀立堦除  
絕勝蘭苕畫不如  
畫影並移當几席  
嵐光相與落圖書  
羽衣霓袖臨風舞  
鴉鬢雲鬟帶晚梳  
珍重二難招未得  
更栽連理伴幽居

道衍

京口覽古

譙廬年來戰血乾  
煙花猶自半凋殘  
五州山近朝雲亂  
萬歲樓空夜月寒  
江水無潮通鐵甕  
野田有路到金壇  
蕭梁事業今何在  
北固青青客倦看

寄虎丘蟾書記

聞道蟾公似贊公  
一餅一鉢寄山中  
雲封蘿屋長疑雨  
泉響松巖半是風  
履破只緣行脚久  
囊空非為作詩窮

遙思短簿祠前夜共聽寒鐘出磬東

溥洽

送金上人古上人制滿同還南翔

涼入西霞木落初送人長是歎離居江山故壘三更夢  
風雨寒燈一卷書變化不同難伏鵠聰明已辯魯為魚  
還山為問南翔鶴秋影何時下碧虛

次韻寄荅一初因懷南竺具菴老人

自笑還鄉野性慵有懷多為白頭翁山樓半點崦嵫日

海郭孤吟舶趁風  
賀監祇應歸鏡曲  
征西也復念譙東  
淒涼莫話平生事  
容易魂消蒼莽中

野人居為吳中行作

桑抽穉綠麥生岐  
男女新年解穀絲  
老至已憐同甲少  
業成未覺見丁遲  
槿籬日薄雞豚散  
花塢春深燕雀知  
却怪閒情消不盡  
據牀長詠竹枝詞

送謙選中住花涇寺

秋風一櫂入花涇  
楊柳芙蓉接水亭  
野老尚能談故事

鄉僧爭請說新經  
楸梧雨外聞啼鳥  
樓閣煙中見濕螢  
欲寫別離無限意  
孤鴻遙沒越山青

### 金園草堂

草堂簷拂水雲低  
花木叢叢繞碧溪  
捲幔躍魚搖倒影  
攤書巢燕落晴泥  
藥苗教子春前種  
蕉葉逢僧雨後題  
幾度畫船移晚棹  
旁人錯比灤東西

### 送彙木菴歸姑蘇

幾年漫浪闔閭間  
城與子追游杖履輕  
煙草鹿臺尋古跡

水雲鷗渚結閒盟江山已入韋郎句齒髮徒傷白傳情  
相送長洲天際路畫船茶竈憶春行

湯時仲小林居

昔年曾過小林居門下蕭蕭古木疎牀雨獨看先世笏  
帳煙還讀外家書杏花紅褪春猶在菜甲青稀曉自鉏  
回首長洲多茂草幾時清嘯落樵漁

送會天元住紹興能仁寺

許詢故宅祇園寺童穉嬉游不記年樓閣參差霄漢上

山川迢遞斗牛邊  
縈池畫引笑渠水  
負郭秋登穰稭田  
今日送君迷舊跡  
都門回首一淒然

德珉

秋懷

江潭葉落雁初飛  
又見涼風到客衣  
日下浮雲迷北望  
天涯孤棹滯東歸  
驚看秋草流年換  
夢憶青山故舊稀  
明日一竿滄海去  
白鷗應笑未忘機

晚泊東湖有懷姚醉雲

水晚陰雲思渺茫，若為孤棹泊橫塘。  
夢回明月人何遠，愁對殘燈夜更長。  
別渚沙寒移宿雁，疎林葉響墮微霜。  
明朝有約新豐道，載酒重過舊草堂。

大岡

寄演福和尚

雨紅煙綠暮春時，獨客終朝有所思。  
白水漾沙金錯落，青山浮几玉參差。  
一簾花妥鶯聲緩，千里書成鶴去遲。  
後夜更看湖上月，滿懷愁緒散如絲。



覺澄

送玉峯琳長老得戒還清泉

來遊江國早相招一到荒山正寂寥  
得戒已聞天竺雨洗心曾見浙江潮  
雲開曉日回蘭棹鶯囀春風上柳條  
欲問清泉何處是毗盧高閣倚層霄

山水間遊為寂菴賦

欲泛滄波下碧層間中跋涉有誰能  
五湖煙浪孤舟月萬里雲山一箇僧  
托鉢頻逢春店食和衣幾宿夜窗燈

舊房門外松將偃海上歸來話葛藤

淨倫

次喬武庫縉金山勝覽韻

妙高臺上昔年遊想徧山中景物幽出洞白雲含海曙  
映窗晴雪湛江流好音常聽樹頭鳥相對不飛沙際鷗  
西望金陵千古意葱葱佳氣帝王州

懷讓

自京師回至江寺聞梵

禪宮仙梵起泠泠一派餘音隔翠屏  
亂逐怒濤翻海島微隨落葉散林坳  
月明馴鶴銜花至晝靜神龍擁座聽  
十載江湖塵土夢今宵却向此中醒

國清寺

遠問天台訪玉峯短筇扶入翠重重  
溪風滿寺散花雨秋色一簾橫古松  
童子倚門長喚鶴老禪談法解降龍  
嬉游何日更相遇雲逐水流無定蹤

玄穆

題焦山寺

獅子峯前放晚叅，直登絕頂縱幽探。  
帆檣遠近迷蒼靄，樓閣高低鎖翠嵐。  
水色倒涵天上下，山形雄壓地東南。  
焦先去後巖扉古，樹老碧桃春正酣。

明秀

寄九杞先生

兩句三年報已成，杞泉涼月照人清。  
九華芝草高踪在，千里冥鴻病眼明。  
野寺柴門香稻熟，漁村江樹晚山晴。

憑誰喚起王摩詰畫汝綸巾杜曲行

得白泉徐侯書

檣李城西從拂袖歸帆直過釣臺西却憐別後無消息  
忽得書來問杖藜江岸鷓鴣悲暮雨柴門燕子惜春泥  
海邊猶有甘棠樹幾向花陰憶貴溪

勝果山中懷朱陳二翁

西閣暮鐘雲氣陰南山秋色故宮深半巖落日照江雨  
萬里長風吹桂林喜見燈花頻入夢病憐物色獨關心

青天雨夜負明月黃葉思君祇自吟

文湛

送王景仙

碧梧秋晚葉皆稀何事行人又遠違  
落日天涯千里別西風江上片帆歸  
山城月出聞猿嘯候館霜清見雁飛  
此後定知難會面相思惟有淚沾衣

定徵

次沈陶菴題石田有竹莊韻

移家種竹楊河上半似湘川半輞川詩好日常題節下  
酒酣時復卧根邊掃門延客還開逕煮笋烹茶或試泉  
我記別來今十載出門添得幾梢煙

廣原

次沈陶菴題石田有竹莊韻

卜得幽居地勢偏風光別是一山川白鷗新水釣簾外  
烏目斜陽拄頰邊繞屋比鄰留野竹清心琴筑倚寒泉  
隔溪西崦禪林近嘗聽鐘聲出暮煙

方澤

西天目高峯塔院

千丈巖扉不易登，真身長閤最高層。  
日中乍見馴簷鳥，雲外時逢禮塔僧。  
行道石邊紛異草，挂衣松上綰長藤。  
青年即有棲遲約，白首誰知尚未能。

宗林

山居用韻荅鳳川朱先生

秋冷啼蛩入講堂，夜深飢鼠攪眠牀。  
山廚食盡松花餅，



瓦鼎煙消栢子香  
半壁綠苔乘宿雨  
滿堦紅葉醉新霜  
幽居漸喜三冬近  
竹几蒲團雪夜長

花椒

欣欣笑口向西風  
噴出玄珠顆顆同  
采處倒含秋露白  
曬時嬌映夕陽紅  
調漿美著騷經上  
塗壁香凝漢殿中  
鼎餽也應加此味  
莫教薑桂獨成功

雪梅

山居詩

道人卓錫愛名山四面巉巖指顧間  
風牖坐聞松子落石牀定起蘚痕斑  
鳴禽花塢春常在隔水柴扉夜不關  
惟有白雲知此意菴前飛去又飛還

德榮

題國清寺

竹院深深近翠微短簾容易墜斜暉  
香殘瓦鼎僧初定月上松巢鶴未歸  
落澗祇供煎茗水洩雲留伴坐禪衣  
客游正值春將半風落桃花片片飛

洪恩

郭山人舍宅

疎竹高梧種始成  
斗壇新出梵音聲  
山銜落照和雲下  
霧斷寒潮隔岸鳴  
石上舊題貞白字  
井邊猶勒葛洪名  
他時猿鶴如相憶  
只尺巢居一葦輕

德清

寄燕都慈壽寺別山長老

當年一鉢久過從  
長夜披衣聽曉鐘  
飯食每懷香積界

經行常憶妙高峯  
潛消瘴熱心含雪  
暗記流年手種松  
為埽蓮花師子座  
待余重舉絕言宗

山居

三冬擁衲坐枯禪  
喜見春光最可憐  
瓦鼎野蔬將獻供  
地爐松火漸無煙  
青山覆雪重開面  
白髮妨寒已及肩  
幸作太平雲卧客  
焚香朝暮祝華年

法生

寄雲東

十年滄海共離羣三月風塵信未聞芳草閉門春冉冉  
落花啼鳥暮紛紛歲華江上看流水世事人間喻薄雲  
雁宕天台何處所采芝捫葛幸同君

法果

答趙凡夫

嗟君長揖謝風塵枯木寒厓是所親薜荔成衣初變姓  
桃花為路不通秦居山寧著炊煙斷作事無招野鶴嗔  
身寄白雲心未穩游絲飛絮亦侵人

佳處亭望金山

迎風獨倚最高臺  
漠漠平沙孤嶼開  
短塔正如看水立  
危峯爭欲渡江來  
片時白浪千帆下  
何處青天一鶴哀  
興極不知歸路晚  
淡煙斜日滿蒿萊

斯學

邊城晚眺

獨上層樓望欲迷  
滿城砧杵更悲淒  
河流曲抱內黃北  
山勢遙連太白西  
落葉亂隨秋雨下  
斷鴻斜引夕陽低

自來幽朔寒偏早繞樹啼鳥未肯棲

智艫

送方同叔游天台

浦樹離離接遠天片帆遙向赤城懸  
春風幾度滄江上驛路千峯落月前  
水冷石梁窺洞壑花深巖殿宿雲煙  
從君此去看霞色猶是興公作賦年

送谷響上人入匡廬石門澗

飄然汝去躡何峯六月匡廬雪尚封  
芒履不妨江路草

淨錡將挂石門松雲開嶺外逢僧影日落巖前見虎蹤  
聞道遠公蓮再發齋時還聽虎溪鐘

欽義

還山雜詩

淨埽松門坐綠苔水聲逗石響奔雷忽驚野鹿驅煙過  
又見昏鴉駕日回曲木全支衰草住矮簷半向夕陽開  
山林未返忘形友日與孤雲自往來

天遂



柳

沐雨梳煙千萬枝，春風挽住定何時。  
青窺鏡裏愁人眼，翠染機中織女絲。  
柔舞難容鶯坐穩，輕搖易惹燕飛遲。  
可憐歲歲章臺路，腸斷忘歸遊俠兒。

志淳

春日過月公蘭若

孤村相叩嗜禪翁，一徑春風到寺中。  
人語悄聞楊柳綠，鳥啼幽出杏花紅。  
經殘瘦坐焚香起，茗熟傳題得句工。

足跡不留簾外土小庭深寂雨空濛

文貞

金明老人黃葉菴落成志喜

埽除荒穢剪凡材卧榻初安四壁苔  
隔浦舟移帆影過隣家客到犬聲來  
霜晨月夕誰為侶屋後堦前盡種梅  
心法別將何物喻蓮花不限滿池開

慧秀

竹間聽反舌鳥

細靄輕嵐散竹林  
搢頤小坐聽晨禽  
未蒸花氣機偏澀  
乍寫春聲意獨深  
緩引易調多種舌  
瑣言難竟一生心  
何如隱忍過殘臘  
末路風煙恐不禁

泓灝

秋江晚歸

流覽山川幽意多  
渾忘落日挂藤蘿  
潮催客子還家櫂  
風送漁舟入浦歌  
深樹煙披連翠幕  
遠峰雲在失青螺  
臨行笑指芙蓉發  
明日還期倚杖過

廣潤

落花得疎字

春來纔見百花舒一夜東風恨有餘  
亂點綠苔沿砌密乍飛紅雨隔簾疎  
辭條弱影傷鶗鴂逐水殘香憶鰕魚  
莫見成陰芳樹底斷魂蝴蝶尚蘧蘧

宗乘

秋日小病同心石師強至山寺

寺門秋竹冷煙扉石路欹斜近翠微  
領略心情忘我病

寂寥光景見人稀  
欲題古壁花生眼  
久坐荒苔蘚透衣  
應笑學空多歲月  
箇中還挂往來機

圓信

早秋過朱子葵太守鶴洲草堂對雨分韻得飛  
字

方花礎潤晚涼歸  
隔浦蓮舟望漸稀  
林下自聞秋葉雨  
燈前亦有草蟲飛  
巡簷半濕黃藤杖  
倚檻重添白苧衣  
明發雪溪新水下  
前村應沒舊魚磯

御選明詩卷九十